

25 AUG 2001

"KISAHMU BELUM BERAKHIR" JUARA PERTANDINGAN LAGU PATRIOTIK

KUALA LUMPUR, 25 Ogos (Bernama) -- Lagu "Kisahmu Belum Berakhir" yang dicipta dan dinyanyikan oleh Shanon Shah Mohamed Sidik dipilih sebagai pemenang pertandingan Lagu Patriotik Malaysia ICOM 2001 di sini malam ini.

Penyanyi berumur 23 tahun dari Kedah yang baru menamatkan pengajian kejuruteraan kimia di Australia tahun lalu itu menerima hadiah RM50,000 dan sebuah piala.

Perdana Menteri Datuk Seri Dr Mahathir Mohamad menyampaikan hadiah kepada pemenang pertandingan itu yang disiarkan secara langsung oleh RTM.

Tempat kedua disandang oleh Azim Sulaiman, 24, dari Selangor yang membawa pulang RM20,000 dengan lagu bersemangat "Negaraku Malaysia". Azim turut menyanyikan sendiri lagu ciptaannya itu.

Gadis dari Kuala Lumpur, Nisha @ Sujatha Arunasalam, 21, merangkul hadiah RM7,500 bagi hadiah tempat ketiga menerusi lagu ciptaannya "One Nation, One Land" yang disampaikan oleh Sheena Suriya Balakrishnan.

Matlamat pertandingan itu ialah untuk menggalakkan remaja Malaysia melahirkan semangat patriotik dan kesetiaan kepada negara menerusi penciptaan lagu dan persembahan.

ICOM adalah singkatan kepada Kolej Muzik Antarabangsa Malaysia yang ditubuh pada 1996 bertujuan melahirkan dan melatih lebih ramai ahli muzik profesional di Malaysia dan rantau ini.

-- BERNAMA
MAM MAM MOZ